



Bosnia and Herzegovina  
Federation of Bosnia and Herzegovina

CANTON SARAJEVO  
Government

20-12-2023

Broj: 02-04-51770-14/23  
Sarajevo, 14.12.2023. godine

Na osnovu člana 26. i 28. stav (2) Zakona o Vladi Kantona Sarajevo ("Službene novine Kantona Sarajevo", broj: 36/14 - Novi prečišćeni tekst i 37/14 - Ispravka) Vlada Kantona Sarajevo, na četvrtoj sjednici održanoj 14.12.2023. godine, donijela je

## ODLUKU

### O REGISTRU JAVNIH POZIVA ZA IZBOR I IMENOVANJE U ORGANIMA NADZORA, UPRAVLJANJA I RUKOVOĐENJA U JAVNOM SEKTORU KANTONA SARAJEVO

#### DIO PRVI - OPĆE ODREDBE

##### Član 1.

##### (Predmet)

- (1) Ovom odlukom propisuje se obaveza uspostavljanja Registra javnih poziva za izbor i imenovanje u organima nadzora, upravljanja i rukovođenja u javnom sektoru Kantona Sarajevo (u daljem tekstu: Registar), obaveza unosa podataka, odgovornost za blagovremenost i autentičnost podataka, rokovi unosa podataka i uređuju druga pitanja koja se odnose na Registar.
- (2) Preporučuje se općinama na teritoriji Kantona Sarajevo i Gradu Sarajevo da pristupe ovoj odluci.
- (3) Pristupanje iz stava (2) ovog člana vrši se donošenjem odluke od strane načelnika, odnosno Gradonačelnika, koja sadrži izričito ovlaštenje Uredu za borbu protiv korupcije i upravljanje kvalitetom Kantona Sarajevo za obradu podataka koji su predmet ove odluke, a koje dostavljaju Vladi Kantona Sarajevo i Uredu za borbu protiv korupcije i upravljanje kvalitetom Kantona Sarajevo.

##### Član 2.

##### (Primjena)

- (1) Ovu odluku dužni su primjenjivati svi organi uprave i službe, javne institucije na nivou Kantona Sarajevo, koje se finansiraju iz Budžeta Kantona Sarajevo, institucije nad čijim radom ministarstva vrše nadzor, javna preduzeća, javne ustanove, fondovi, zavodi, čiji je osnivač Kanton Sarajevo (u daljem tekstu: Institucije) koji provode javni poziv za izbor i imenovanje lica u organe nadzora, upravljanja i rukovođenja u Instituciji.
- (2) U Registru se evidentiraju podaci na način predviđen u Uputstvu za unos podataka u Registar javnih poziva za izbor i imenovanje u organima nadzora, upravljanja i rukovođenja u javnom sektoru Kantona Sarajevo (u daljem tekstu: Uputstvo), koje će izraditi Ured za borbu protiv korupcije i upravljanje kvalitetom Kantona Sarajevo (u daljem tekstu: Ured).
- (3) Podaci evidentirani u Registar javno se objavljuju, putem Informacionog sistema Ureda.

##### Član 3.

##### (Rodna neutralnost izraza)

Riječi i pojmovi koji imaju rodno značenje korišteni u ovoj odluci odnose se jednako na muški i ženski rod, bez obzira jesu li korišteni u muškom ili ženskom rodu.



Adresa: Reisa Džemaludina Čauševića 1, 71 000 Sarajevo  
Tel: + 387 (0) 33 562-000, Fax: + 387 (0) 33 562-076  
Web: <http://vlada.ks.gov.ba>, E-mail: [vlada@vlada.ks.gov.ba](mailto:vlada@vlada.ks.gov.ba)

1/3

#### **Član 4.**

##### **(Svrha uspostavljanja Registra)**

Registar služi kao jedinstvena evidencija podataka o javnim pozivima za izbor i imenovanje u organima nadzora, upravljanja i rukovođenja u javnom sektoru Kantona Sarajevo, a u svrhu osiguranja većeg nivoa zakonitosti, transparentnosti, konkurentnosti i jednakih mogućnosti u ovom procesu.

### **DIO DRUGI - SADRŽAJ I VOĐENJE REGISTRA**

#### **Član 5.**

##### **(Sadržaj podataka u Registru)**

- (1) Ured u Uputstvu definiše sadržaj podataka u Registru.
- (2) Ured može vršiti korekciju podataka u Registru u smislu dodavanja novih i brisanja postojećih podataka, a sve u svrhu tehničkog unapređenja Registra.

#### **Član 6.**

##### **(Obaveza unosa podataka)**

- (1) Podatke o javnom pozivu koji provodi, Institucija u Registar unosi u skladu sa odredbama ove odluke i Uputstva.
- (2) Institucija je dužna imenovati ovlaštena i odgovorna lica za unos podataka u Registar, koji će imati posebne korisničke šifre za unos.
- (3) Institucija je dužna imenovati lica iz stava (2) ovog člana i dostaviti Uredu podatke o imenovanju u roku od 10 dana od dana stupanja na snagu ove odluke.
- (4) Institucija putem lica iz stava (2) ovog člana, vrši neposredan unos podataka o javnom pozivu koji provodi u Registar, a putem Web aplikacije koju je uspostavio Ured.
- (5) Podaci o javnom pozivu biće dostupni putem informacionog sistema Ureda (Anti – CorruptiKS).

#### **Član 7.**

##### **(Blagovremenost i autentičnost podataka)**

- (1) Institucija vrši unos podataka o javnom pozivu shodno rokovima propisanim u Uputstvu.
- (2) Unos podataka vrši se na osnovu dokumentacije koja je nastala u postupku provođenja javnog poziva.
- (3) Za autentičnost i tačnost unesenih podataka o javnom pozivu odgovorna je Institucija.

#### **Član 8.**

##### **(Uspostava, vođenje i upravljanje Registrom)**

- (1) Ured uspostavlja i vodi Registar.
- (2) Rok za uspostavljanje Registra je 30 dana od dana stupanja na snagu ove odluke.
- (3) Rok za donošenje Uputstva i dostavljanja Uputstva Institucijama iz člana (2) ove odluke je 30 dana od dana stupanja na snagu ove odluke.
- (4) Upravljanje Registrom, praćenje rokova za unos podataka, reagovanje prema Institucijama u slučaju nepoštivanja ove odluke u bilo kojem segmentu u nadležnosti je Ureda.

### **DIO TREĆI - KORIŠTENJE I ČUVANJE PODATAKA**

#### **Član 9.**

##### **(Vremenski period korištenja)**

- (1) Podaci iz člana 5. ove odluke obrađuju se za vrijeme trajanja perioda imenovanja, odnosno godinu dana nakon isteka perioda imenovanja, razrješenja, odstupanja sa imenovane funkcije ili drugog načina prestanka obnašanja imenovane funkcije.
- (2) Period obrade podataka može se mijenjati u slučaju da se promijene zakonski ili podzakonski propisi koji tretiraju predmetnu oblast.



## Član 10.

### (Osiguranje uslova za vođenje Registra)

Rukovodilac Institucije odgovoran je za osiguranje potrebnih kadrovskih i tehničkih uslova za unos podataka u Registar.

## DIO ČETVRTI - PRELAZNE I ZAVRŠNE ODREDE

## Član 11.

### (Nadzor nad primjenom)

- (1) Nepostupanje po članu 6. stav (2) i (3) ove odluke predstavlja osnov za razrješenje odgovornog lica - rukovodioca Institucije, koju pokreće organ nadležan za njegovo razrješenje, a na osnovu inicijative dostavljene od strane Ureda.
- (2) Nepostupanje po članu 6. stav (4) i članu 7. stav (1) ove odluke predstavlja povredu radne obaveze lica iz člana 6. stav (2), te daje osnov Uredu za podnošenje prigovora na rad istog rukovodiocu Institucije koji je imenovao ovlašteno lice za unos podataka u Registar.
- (3) Nadzor nad primjenom ove odluke vrši Ured.

## Član 12.

### (Stupanje na snagu)

Ova odluka stupa na snagu narednog dana od dana objavljivanja u „Službenim novinama Kantona Sarajevo“.



### Dostaviti:

1. Predsjedavajući Skupštine Kantona Sarajevo,
2. Zamjenici predsjedavajućeg Skupštine Kantona Sarajevo (3x),
3. Premijer Kantona Sarajevo,
4. Ured za borbu protiv korupcije i upravljanje kvalitetom Kantona Sarajevo,
5. Ministarstva Kantona Sarajevo (12x),
6. Službe Kantona Sarajevo (9x),
7. Samostalne kantonalne uprave (2x),
8. Samostalne kantonalne upravne organizacije (5x),
9. Svim javnim ustanovama Kantona Sarajevo (5x) (putem Ministarstva za odgoj i obrazovanje Kantona Sarajevo, Ministarstvo za nauku, visoko obrazovanje i mlade Kantona Sarajevo, Ministarstva zdravstva Kantona Sarajevo, Ministarstva za rad, socijalnu politiku, raseljena lica i izbjeglice Kantona Sarajevo i Ministarstva kulture i sporta Kantona Sarajevo),
10. Svim javnim preduzećima Kantona Sarajevo (4x) (putem Ministarstva saobraćaja, Ministarstva komunalne privrede, infrastrukture, prostornog uređenja, građenja i zaštite okoliša Kantona Sarajevo, Ministarstva pravde i uprave Kantona Sarajevo i Ministarstva privrede Kantona Sarajevo),
11. Fondovi (4x),
12. Svim općinama na teritoriji Kantona Sarajevo (9x),
13. Grad Sarajevo,
14. Za objavu u „Službenim novinama Kantona Sarajevo“,
15. Evidencija,
16. A r h i v a.



Adresa: Reisa Džemaludina Čauševića 1, 71 000 Sarajevo  
Tel: + 387 (0) 33 562-000, Fax: + 387 (0) 33 562-076  
Web: <http://vlada.ks.gov.ba>, E-mail: [vlada@vlada.ks.gov.ba](mailto:vlada@vlada.ks.gov.ba)